

東
華
續
錄

東華續錄

乾隆十七

臣王先謙敬編

臣周澐恭校

乾隆八年癸亥春正月丁巳諭仲永檀洩漏密奏一案由於仲永
檀趨附鄂容安而鄂容安因向伊詢問原屬多事理應懲治但鄂
容安從前在阿哥書房行走尙好且伊父大學士鄂爾泰年老有
病鄂容安從寬免發臺站仍在阿哥書房行走嗣後當閉戶讀書
不預外事儻因見經革職在書房行走不似從前盡心朕必重治
其罪大學士鄂爾泰當嚴切教訓之○召孫嘉淦來京以阿爾賽
爲湖廣總督由廣東將軍遷○己未命安插準噶爾降人於甯古塔○甲
子徙臨淮縣城於周梁橋○戊辰截留浙江漕糧十萬石於福建
備賑○乙亥調賽爾赫爲內閣學士以吳拜爲倉場侍郎由內閣學士遷

○壬午以德新爲盛京工部侍郎

由內閣學士遷

二月庚寅

上御經筵

○壬辰允內閣學士李紱以病致仕尋陞

辭

上問有所欲陳否紱以慎終如始對賜詩嘉之○癸巳諭昨

因考選御史試以時務策杭世駿策稱意見不可先設畛域不可太分滿洲才賢雖多較之漢人僅什之三四天下巡撫尙滿漢參半總督則漢人無一焉何內滿而外漢也三江兩浙天下人才淵藪邊隅之士閒出者無幾今則果於用邊省之人不計其才不計其操履不計其資俸而十年不調者皆江浙之人豈非有意見畛域等語國家選舉人才量能器使隨時制宜自古立賢無方乃帝王用人之要道滿漢遠邇皆朕臣工聯爲一體朕從無歧視若如杭世駿之論必分別滿洲漢人又於漢人之中分別江浙邊省是乃設意見分畛域之甚者何所見之悖謬至此况以見在而論漢

大學士三缺江南居其一浙江居其二漢尚書六缺江南居其三
侍郎內之江浙人則無部無之此又豈朕存畛域之見偏用江浙
之人乎至於用人之際南人多而間用北人北人多而又間用南
人督撫之中有時滿多於漢或有時漢又多於滿惟其才不惟其
地亦因其地復量其才此中裁成進退權衡皆出自朕心卽左右
大臣亦不得參與况微末無知之小臣乎且國家教養百年滿洲
人才輩出何事不及漢人杭世駿獨非本朝臣子乎而懷挾私心
敢於輕視若此若稍知忠愛之義者必不肯出此也杭世駿著交
部嚴察議奏尋革職○引見中書胡寶琮等十二員得旨胡寶琮
徐逢震葛德潤愛必達六十七吳達善丁廷讓永世高誠吳日燦
俱著記名歸於見在記名人員內以御史用沈澗著發往江南交
與該督撫酌量題補○甲午以張楷爲內閣學士

原任安徽巡撫○調劉

於義爲山西巡撫以孫嘉淦署福建巡撫○乙未都察院奏湖南巡撫許容題參糧道謝濟世一案先經署湖南糧道倉德申詳漕運總督顧琮文內稱升任四川藩司王玠赴任過岳攜帶湖南藩司張燦書函並長沙府詳冊屬令改換文移等語今據顧琮咨院應據實奏聞得旨這所奏情節著交與孫嘉淦秉公據實一併審理具奏原札詳冊並發○己亥命九卿保舉堪任河工人員○庚子命阿里衮往湖南會同審謝濟世參案○召德沛來京以尹繼善署兩江總督○辛丑莊親王允祿等奏武舞之干戚干上有字其字止五種而分八佾既不齊一又多互異考之太常皆不能對必係原有八樣年久遺失以譌傳譌今請訓定奉祿筆改定兩賜時若四海永清倉箱大有八方牧甯奉三永奠得一爲貞百神受職萬國來庭○命青海馬貢寬免五年○癸卯諭朕君臨天下愛

養黎元拯災恤困夙夜孜孜惟思去其顛危登之衽席並望風俗
茂美人心醇樸各葆天良以召和氣夫然而朕責始盡朕心始安
上年上下江夏秋被水朕痾瘝念切蠲賑頻施特命大臣前往會
同該督撫等加意撫綏又令興修水利整理河防救目前之災荒
弭將來之水患所費帑金以千百萬計倉廩漕儲遠近接濟凡有
關於民食者莫不移緩救急養欲給求所以體上天仁愛之心盡
父母斯民之道亦既殫宵旰之經營矣爲士庶者當知國家恩恤
已逾常格務各安其本業共勸勉爲馴良始無負朝廷勤恤民隱
之至意乃聞各屬災民其實知感恩靜待給賑者固多而無知愚
氓有以查賑稍遲聚眾強求者且有並未遲緩已得賑糧仍隨眾
扳號希心分外者更有狡猾之徒本籍賑過卽攜眷逃荒復赴鄰
境留養及至下月又奔回本籍領賑者甚而本非無業貧民串通

胥吏濶入賑冊或依藉聲勢冒濫與賑種種情弊層出不窮且沿途呼索男女濶雜喧譁悍潑罔顧廉恥而各屬生監藉有貧生一體賑恤之例卽家非貧窶亦冀邀恩所求不遂卽從中生事煽惑阻撓身列衣冠恬不知檢士習民風撓漓若此其有關於人心風俗實非淺鮮夫蠲除賑貸原屬國家之恩澤各屬災民平時不知爲未雨綢繆之計及遇荒歉復不思刻苦營生竟若仰食公家可忘儉歲甚且不以荒歉爲可憂而以荒歉爲可幸恃特沛之恩膏啓無窮之希冀本計不敦驕風日熾勢將何所底止習俗之漓莫此爲甚朕思德惟善政政在養民而厚生尤宜正德安集之後化導爲先其地方有司雖有教民之責而刑名錢穀政務殷繁難以徧及卽學政教職衡文課士亦不能兼理民情必特設專員巡行整飭專心化導方有裨益著大學士等於翰林科道內揀選品行

端謹通曉民事者四員授爲宣諭化導使馳驛前往江南以二員
整理下江之淮徐揚海四府州以二員整理上江之鳳潁泗三府
州令其親歷各屬鄉城計其道里巡行一徧周而復始所至之處
傳齊紳衿士庶宣講 聖諭廣訓反復開導使知驕詐之習不難
懲之以法念此無知之輩皆屬赤子朕心有所不忍務在感發其
天良鼓動其廉恥俾明於大義務本安分則革其頑情而薄俗可
以還醇儻如此開導而猶有怙過不悛者卽加以罪夫復何辭
奉差官員毋得視爲具文虛應故事其儀制文移悉照各省學政
之例給與欽差官員關防道府以下凡有關於宣諭化導者聽其
節制其餘一切地方事務不得干預以專責成儻地方有司恃有
宣諭化導使遂自怠其教民之職准宣諭化導使會同該督撫題
參○以待講鄧時敏給事中倪國璉爲鳳潁泗三府州宣諭化導

使編修涂逢震御史徐以升爲淮徐揚海四府州宣諭化導使○
甲辰吏部議奏江蘇學政內閣學士劉藻於高郵州劣生朱愷士
寶應縣劣生劉炯等聚眾冒賑一案平時不能化導應照例降三
級調用原任內閣學士劉師恕不能約束族弟劉炯致於委員查
災時挾制冒賑應革職從之○大學士鄂爾泰等議覆高斌周學
健奏朱子所輯小學一書始自蒙養爲立教之本繼以明倫爲行
道之實終以敬身爲自修之要於世教民心甚有裨補請將內廷
所藏小學書本頒行直省刊布並於宣講 聖諭廣訓之後切諭
紳衿耆老廣爲傳告俾生其慕善畏惡之心革其頑惰刁詐之習
於災屬民人尤爲有益至童生府縣試卽請將小學與孝經一體
命題試論一道院考覆試亦試小學孝經論一篇等語查學院覆
試用孝經小學論原係見行之例但近來學臣或有不以小學命

題者或有視爲具文者嗣後應令學政於覆試論務用小學命題
凡府縣試亦令於覆試時用小學命題作論一篇必通曉明順者
方許錄送學臣考試飭部令各直省通行再查小學刊布甚廣所
請內廷刊頒之處毋庸議從之○以彭啓豐爲內閣學士劉永澄
因病解任以彭樹葵趙大鯨俱爲副都御史

彭樹葵由宗人府府丞趙大鯨由大理寺

遷○庚戌停江南牛稅一年○辛亥革職禮部尙書咸安宮效力
行走趙國麟年老有病加恩准其回籍○癸丑諭向來

先農壇

親祭始用中和韶樂遣官則同小祀之例不用中和韶樂查

朝

日夕月等中祀雖遣官仍用中和韶樂但不飲福受胙而已朕

思國之大祀在農先農宜在中祀之例此次遣和親王恭代卽

著照朝日夕月等壇之例用中和韶樂永著爲例○是月署

雲南總督張允隨奏上年十一月安南猛發賊首兵者列糾洪水

賊余襄攻劫安邊牡丹土官翁卿約者良土官將地方歸順交江
又結猛發銅廠匪賊郎袍桂皮山野賊農廷結楊元福陸玉明陸
保等至牡丹合四五千人在者良駐紮謀攻念臺念臺土官翁貴
求救於保樂州以保樂兵一千擊郎袍敗還三岐督鎮官策應爲
洪水沙賊阻不能前土目翁欽翁貴黃裘壽等擊敗安邊沙賊紮
營於賭呪河隔岸本年正月叛目阮兼澤翁卿結賊郎袍周文顯
聚眾數千營於吉安洲保樂土官翁督及翁貴各帶兵共四千名
營於句麻爲者良賊戰敗賊分兵破果箴弄高二寨郎袍復過保
樂營截其運道保樂兵卻走黎京差督陣官調高平牧馬先鋒官
閉土儀等合兵八千討賊督陣官陣亡念臺破交江王矣揚紮念
臺招安原管地復往安邊與翁貴戰翁貴襲安北府原據安北之
黎忠君退屯漫停外此有八寶東弓漫布泰番鼎礮大同猛薩各

賊首兵二三千人清化邵郡公扶竜德世子黎維禱帶兵三千餘抵山南府安南國內惟山西山南山北海洋四郡服黎京轄其清化廣化二郡爲舊世子黎維禱所據安廣易安二郡爲阮氏子孫所據諒山太原二郡爲茹姓所據興化宣光二郡爲交江所據地分土荒督令官調集鄉兵俱以乏食逃亡臣令文武等於通交要隘嚴加防範報聞

二月乙卯朔以開泰爲內閣學士

由祭酒遷

○丙辰命王貝勒貝子公

等庶福晉側室所生子俱降二等予封○先是宗人府議請合試

左右兩翼宗學生拔取佳卷准作進士至是

欽命大臣考取一

二等佳卷進呈宗人府帶領引見得旨考取之宗室玉鼎柱達麟

圖福喜俱准作進士與乙丑科會試中式之人一體殿試引見或

選入翰林或以部屬等官補用候朕臨時降旨嗣後俱照此例行

○甲子減福建莆田等場漁課○丙寅盛京兵部侍郎阿山乞休

允之○張旻咎以原品致仕以多綸署山西按察使

原任直隸按察使

○

庚午調喀爾吉善爲山東巡撫晏斯盛爲湖北巡撫范琛爲安徽

巡撫

由山東調

○辛未前任湖廣總督孫嘉淦題已革湖南糧道謝濟

世訊有強勒鋪民購米浮收價銀劣蹟應依枉法贓律議不准折

贖得旨此案俟阿里衮孫嘉淦會審具題到日再降諭旨該部知

道○壬申免安徽鳳陽等三府州屬災民帶徵銀米○癸酉都察

院奏湖南岳常道倉德密揭湖南布政使張琛屬將承審衡陽縣

收漕一案改換詳文總督孫嘉淦諭令婉曲善處事屬兩難懇請

轉達得旨都察院摺奏岳常道倉德通揭上司抑勒換詳一事會

申詳總督孫嘉淦孫嘉淦批令該道婉曲善處且云審時不問此

款等語孫嘉淦身爲總督又承旨審辦此案接到倉德揭帖時卽

應奏聞將揭內情節審理乃故寢其事不行陳奏而審案內並無一語及倉德所揭情由扶同許容草率完結甚屬徇庇有失封疆之體俟此案結後著該部嚴察議奏其都察院原摺交與阿里衮將此案前後情節逐一查審具奏○庚辰 上詣 壽祺皇貴太

妃宮問疾○辛巳以春山爲盛京兵部侍郎伍齡安爲內閣學士

由通政使達

○命沿江駐防大員兩年出巡一次○免順天通州雜稅

夏四月甲申朔

壽祺皇貴太妃薨

上欲持服莊親王允祿等

祈免○諭軍機大臣等近來各省督撫奏事較前甚少而此三日

內竟無一奏摺實數年來之所未有豈地方果無可陳奏之事耶

抑督撫漸趨於寬緩之習有事而不奏耶夫政簡刑清自古以爲

上理然必治行廉平風易俗美而後可收政簡刑清之實效若徒

務乎虛名則不過習於苟安身自暇逸久之而事皆廢弛百弊叢

生其害非淺鮮矣卽如督撫摺奏屬員賢否一事原欲其常爲留心隨時訪察陳奏朕前以備簡用乃督撫等多有於奉旨之後陳奏一次虛應故事後遂置之不辦者夫一省之中二三年之久屬員更換者不少豈不當秉公甄別將才守可稱者舉以奏聞耶嗣後各省督撫奏舉屬員著定以三年一次舉行又見督撫所奏皆係藩臬道府等官此等大員朕皆知之或較該督撫更爲明晰若卽以此塞責豈朕造就人材之意況今日之道府卽將來之藩臬今日之州縣卽將來之道府若督撫不將州縣等官治蹟據實上聞朕何由知悉而量材器使耶卽武職總兵副參等官亦所以儲干城之選各督撫均應留心至於藩臬在雍正年間原不時奏事而比來亦覺寥寥學政亦有奏事之責今竟有莅任三年未奏一事者夫有意按尋以滋紛擾固非政體而應奏不奏緘默因循朕

何以收明目達聰之益可傳諭各省督撫等其各振作惕勵悉朕
意焉○乙酉 上詣 壽祺皇貴太妃宮致祭○戊子命直省嗣
後遇旱筭杖以下均減等發落○辛卯命於奉宸苑試行區田法
○癸巳增山西岢嵐等二十五州縣社穀○兵部議覆浙江巡撫
常安奏軍流人犯僉妻同遣在立法之初原令被罪之人尙獲夫
婦之聚但本犯孽由自作妻妾究屬無辜請將不願離者令從夫
而行其願留者不必繫繩以法應如所奏如果本夫情願攜帶妻
妾或其夫不願而妻妾願從者或本夫情願攜帶而妻妾背義不
從者俱行僉發不得託故規避如無以上情節槩令免僉從之○
丙申纂修醫宗金鑑成○己亥諭朕惟萬民以食爲天八政以農
爲本朕御極以來重農貴粟薄賦輕徭諸如籌積貯蠲米稅凡所
以爲民食計者旣周且悉直省地方宜乎糗梁充裕價值平減閭

閭無艱食之虞矣乃體察各處情形米價非惟不減且日漸昂貴不獨歉收之省爲然卽年穀順成並素稱產米之地亦無不倍增於前以爲生齒日繁耶則十數年之間豈遂眾多如此若以爲年歲不登則康熙雍正間何嘗無歉收之歲細求其故實係各省添補倉儲爭先糴買之所致從前議於各省額設常平二千八百餘萬石之外令各省舉行納粟入監之例增定穀數三千二百餘萬石原期實倉庾以備緩急乃諸臣奉行不善經數年之久所收捐穀僅六百餘萬石而米價無處不昂是未收積儲備用之益而先貽穀貴病民之累豈朝廷立法之本意哉蓋買穀貯倉原恐民有餘粟不知撙節以致糜費是以令官廣爲收買以爲儲蓄之計若民間需用之際而急於購買商賈悉皆裹足此羸彼絀其理顯然况一省所出應足供一省之用今因一省產米獨多而各省羣趨

而糴之則多米之省亦必至缺乏而後已再捐監之生卽係本地百姓捐納之穀並非運自外省在田間所收止有此數積穀之家既已納之於官無穀之戶又必買之於市將不能蓋藏於家又不能流通於外穀愈少而價愈昂亦何怪其然也朕思天下米價頻增乃民食不足之漸大有關繫當令各省督撫從長妥計其常平原額固不可缺至鄰省採買及捐監收米之例俱應一槩暫停俟豐稔之後米價如常再徐徐辦理其如何酌定之處著大學士會同九卿詳議速奏尋議鄰省採買及捐監收米之例暫停則常平原額自不可缺如該處見存穀石原額之外仍有捐貯穀石遇賑恤及常平平糴之用於原額無須動用者止將糴價解司庫無庸買補若常平原額雖敷而捐貯無多適遇賑恤平糴勢不得不動用原貯穀石其糴價仍存司庫應令該督撫從長妥計因時籌畫

如有前項額穀未買適當本地年歲豐稔卽以羅價陸續買補至捐監收米之處亦令酌量地方情形若遇豐歲捐米無害於民照原定應納數目收捐至御史李清芳奏各省捐監俱照福建江西例每名以二百兩捐收則倉貯自多見在此二省業已通行不可中罷等語查各省監生戶部原議每名捐銀一百八兩其應納穀石係照依本省米石價值低昂分別其江西福建二省准其酌減捐穀之數者亦係該督撫酌量辦理若各省俱照此例勢必多所更張再各省捐例俱已暫停未便於此二省不行停止得旨江西福建仍於一年限滿該督撫具奏請旨餘依議○命揀選編修檢討堪勝知府人員○庚子改江南海防道爲淮徐海巡道○甲辰飭沿海各省嚴緝洋匪○免浙江烏程縣通賦○丁未召孫嘉淦來京以周學健署福建巡撫○戊申諭漢軍同知守備以上毋庸

改歸民籍

閏四月乙卯諭據侍郎阿里袞摺奏承審許容參劾謝濟世一案與從前孫嘉淦會同許容審理之處情節多有不符朕思湖南上下各官瞻徇成風固結難解許容張璟係見任撫藩通省畏懼誰敢吐露實供難成信讞許容張璟均著解任知府張琳知縣樊德貽李澎俱革職交與阿里袞審明定擬具奏再撫藩一時解任不便令按察使一人兼行護理湖南巡撫印務著蔣溥速行前往署理蔣溥未到任之前著阿里袞暫管其布政使印務著按察使照例署理孫嘉淦既草率扶同於前此時不便會同審理該部卽速行文前去○丁巳 御試翰林詹事等官擢王曾汾等三員爲一等餘升黜留館有差○戊午諭昨考試翰林時由部屬等官用入翰詹衙門者皆不與朕思伊等已升用翰詹讀書作文乃其職分

事既不似侍衛之足供差遣又不似部曹之日辦簿書若徒虛糜俸祿豈不貽素餐之譏且伊等雖不由庶吉士升轉實俱科甲出身縱使不能詩賦如作論繙釋又豈得謝曰不能著傳於初七日齊集圓明園候朕出題考試嗣後考試翰林時卽將此等由別衙門改授者一併傳集另題考試永著爲例○辛酉補試由部院改入翰詹人員學士孔泰等升黜有差○壬戌諭湖廣吏治廢弛已極前謝濟世一案許容冤誣鍛鍊孫嘉淦瞻徇扶同朕已降旨將許容解任孫嘉淦不准會審今又聞楚省盜案甚多營伍更屬廢弛水路無巡江船隻陸路無會哨官兵所謂遊巡皆虛應故事以致盜賊肆行全無畏懼其水師營汛竟有哨船久泊江岸無人駕用致有船多於兵之謠是孫嘉淦許容身任封疆惟事敷衍虛文並無一毫實際因而文武效尤上下頽廢其罪已至不可問矣謝

濟世一案情節見已顯著孫嘉淦許容亦無可再問著卽來京候
旨若有應行質審之處著阿里袞奏明留彼俟事竣帶回○戶部
議准湖廣總督阿爾賽奏湖北長樂縣與湖南石門縣疆界里連
中有蘆黃山一座請以山脊分水爲界山南屬石門北歸長樂從
之○甲戌申命甘肅河州團練二十四關鄉勇○乙亥以長桂爲
湖南布政使

由給事中遷

○丁丑諭嗣後閏月常朝所用樂章視時憲

書所載交節之時用上月宮調交節之後用下月宮調永著爲例
五月丁酉增福建佐雜官養廉○己亥免江蘇山陽等十三州縣
牙稅○丙午命恭繕 歷朝實錄送盛京尊藏○召雅爾圖來京
調碩色爲河南巡撫以紀山爲四川巡撫

由兵部侍郎遷

○戊申調慶復

爲川陝總督馬爾泰爲兩廣總督實授張允隨雲南總督兼管巡

撫事○辛亥以喝命省釋徒杖以下日給重囚水水藥餌○蘇祿

國王麻喊末阿稟勝甯遣陪臣表貢方物奏請三年後復修職貢
得旨覽王奏進貢方物具見惻忱知道了爾國遠隔重洋再修職
貢將敬輸誠良可嘉尙至所請三年復貢之處恐該國道遠風信
難期著仍遵雍正五年所頒 敕諭內酌俟五年之外一修歲獻
之旨行該部知道○是月河南巡撫雅爾圖因豫省上年歉收停
緩額賦奏謝內稱水旱雖堯湯不免殊恩實千載難逢並陳辦事
認真居常忤物等情得旨朕從不以地方偶有水旱歸過督撫惟
有令其加意撫綏使朕赤子不致凍餒耳汝則不然從不體朕此
心必欲以地方屢豐爲汝政治之效試思汝一省尙可若朕亦存
此心其如蒼生何且堯湯不免水旱若視水旱爲固有之常而不
知懼此則致亂之由而必欲以無水旱爲政治之符亦惟勤其政
耳豈有政治之失處尙多而侈談豐裕將水旱漠不關心之理卽

如前次陛見朕觀汝高視闊步昂然自得之意已知汝必有滿招損之禍矣此奏全屬客氣朕亦無別諭汝其候旨可也

六月壬子朔以天熱受暑者多分賞京師九門帑銀一萬兩圓明園二千兩備冰水藥餌○命河南巡撫修太皞伏羲陵廟○癸丑定藩臬任滿三年入覲例○大學士等議覆江西巡撫陳宏謀奏今日耗農功妨地利者莫如種煙一事乾隆元年學士方苞條奏請禁部議不准詳繹部駁一則以已經種煙之地再種蔬穀苦惡難食徒成棄壤一則以種少煙貴偷種者多犯法者眾一則煙地入官罰及鄰右牽連滋擾今籌禁止之法城內仍許種煙城外及各鄉槩不許種如有種者責成鄉保報官將煙草入官若云禦瘴氣風寒自明代以來未見盡爲瘴癘風寒所侵卽今不喫煙者未嘗不入瘴鄉其非必不可少之物明甚但已種之煙全令拔除未

免失業請以甲子年爲始令地方官通行禁止等語查民間種煙向有例禁無如積習相沿直隸山東江西湖廣福建等省種植尤多穀土日耗且種煙之地多係肥饒誠令改種蔬穀則自八月收煙後至來春相隔半載土氣已復並無不宜蔬穀之處如或以不種則失業改種則利輕又當知煙無關於飢飽原不必論其貴賤自應禁止惟城堡內閒隙之地聽其種植城外則近城畸零菜圃亦不必示禁其野外土田阡陌相連之處槩不許種得旨允行○甲寅諭南掌國貢象舊例以五年爲期朕思該國僻處天末遠道致貢未免煩勞著改爲十年一貢以示朕柔遠之意○丙辰以旱申命求言○戊午諭本月初四日進愛奏請進見朕因伊係欽天監堂官當此亢旱炎蒸星象或有無變異關繫政治之得失是以面加詢問伊奏稱星象並無變異之處但目下天氣亢旱有應行

調劑者約舉四條朕令寫出交大學士等議奏及覽所議之摺第一條內開向例禁止燒鍋賭博鬪雞鵲鴉之類應大弛其禁使民自便則和氣感召自可雨暘時若第二條內開從來官員原皆定有陋規到任卽能充裕又加以耗羨是以辦事從容今一槩禁革以致莅任後不能償還借貸等語悖理傷道莫此爲甚至三條之言稅課四條之言刑罰皆係見在已行之事勉強湊合經大學士等議駁朕尙恕其無知置之不問今日忽又封奏云五月初九等日金星晝見初九十九等日屢次流星夜見等語若其言果實何以彼時不奏且朕前日面詢又以爲並無災異今忽爲此語豈非幸災樂禍任意捏造以蠱惑人心乎且其摺內又稱去歲彗星見象時伊曾將淮揚水災今歲京師盛暑豫先奏過皆伊並未奏及之事捏爲已奏更屬無恥愚而詐之甚也又條陳時事數件如大

學士於一切本章應行夾籤九卿應時常召見督撫等官應行選擇等語大學士之夾籤與否伊何由得知且見今何嘗不夾籤朕以得人則諸事就理雖道府等官槩令陛見請訓而况九卿九卿之未嘗數召見者則留保木和林滿色張廷璐張廷瑑王承堯許希孔數人也且此數人卽今日日召見能有裨於政治耶若督撫之慎選更不待言進愛獨全不聞知耶又稱京官外用則以爲樂外官內用則以爲苦宜加調停不知伊意欲如何調停想不過欲貪黷公行賄賂交通亦如民間之燒鍋賭博槩弛其禁乃爲快意耶至於內務府何至開張鋪面與民爭利此人所共知共見者伊不知何處來此夢囈之語朕因數日天氣亢旱炎熱倍常明係上天垂象以示儆想因朕躬之闕失與用人行政之失宜時加省惕倍切憂勤若人臣進言苟有可採朕必樂聞若似此卑鄙悖謬任

意捏造且有意惑人聽聞者則不可不加懲治况欽天監職司推步豈可妄逞邪說疊亂人心進愛著該部嚴察議奏並將伊摺內

謬誕之處曉諭臣工知之○己未雨○辛酉免直隸慶都等四州

縣民欠○壬戌調留保爲內閣學士以德沛爲吏部侍郎

原任江蘇南豐督

○以開泰爲兵部右侍郎

由內閣學士遷

岳藩爲福建按察使

由光祿寺卿遷○

丁卯諭山東山西河南陝西恤病暍者○御史西成奏伏見前諭

九卿之未嘗數召見者則留保木和林滿色張廷璐張廷璩王承

堯許希孔數人也且此數人卽今日召見能有裨於政治耶仰

見聰明睿智諸臣能否無不洞見而不忍遽加罷斥請敕部曉諭

諸臣令各自陳居官實蹟或調用或休致得旨御史西成所奏似

是而非未免言之太過不知朕意前日進愛奏摺內有請時常召

見九卿可以知其才品有裨政治之語夫朕於九卿召見者甚多

不但確知其行事並且深悉其隱微進愛竟以朕爲不常見九卿
若不知九卿之底裏者是以明白曉諭並及九卿中數人不數召
見之故其實此數人者資以啓沃加以諮詢固不足以有裨政治
亦尙各恭謹奉職黽勉不遑並無過愆卽應罷斥之處何至不可
居位而責以避賢路乎假使應升卿貳之員果有傑出之才高出
諸臣之上朕早進彼黜此推賢讓能矣而無如見在各員亦皆中
等才具若用爲卿貳未必不與諸臣等或且不及亦未可知又何
必輕棄舊人而擢用新進乎朕聞人主臨下之度在於包荒用人
之道貴乎造就內外大臣眾多豈盡能才全德備一無可議亦惟
量材器使用其所長教其所短以合乎古帝王與人不求備之義
耳前因進愛條陳召見九卿朕憤於彼之謂朕不知人是以評論
及此數人而無知之小臣遂以諸臣不應晏然居位爲言大非朕

兼容曲成之意朕轉悔前言之有失含宏也今特將朕用人之本
意求才之苦衷曉諭諸臣共知之西成摺並發○諭御史胡定參
劾許容誣參謝濟世一案今據侍郎阿里袞逐一審明胡定所參
俱實此案朕特命孫嘉淦前往湖南會同許容秉公查審倉德又
復揭報張璨等致札換詳等弊亦交孫嘉淦審理乃孫嘉淦一槩
蒙混具題經侍郎阿里袞研審始得實情朕思胡定身為言官若
言事不實自有應得之處分今既實矣若止爲謝濟世辨白冤抑
其事尙小因此察出督撫等之挾私誣陷徇隱扶同使人人知所
儆戒此則有裨於政治爲益良多胡定著交部議敘至於各省督
撫身任封疆必舉劾悉秉公心方不負朕之委任若以愛憎爲舉
劾如孫嘉淦許容之居心行事豈不抱愧大廷負慚夙夜各督撫
等當深自儆省以許容孫嘉淦爲炯戒○滿色以年老休致調勒

爾森爲禮部侍郎以旺扎爾爲理藩院侍郎

由部統遷

○辛未諭軍機

大臣等前尹繼善奏淮水爲洪湖上游見在淮水陡長丈餘儻續長不消有必須宣洩之勢自當權其輕重相機妥辦斷不敢將就因循以貽百姓之累朕已經批示矣今白鍾山亦奏稱淮水儻積長不消洪湖難以容受有必須宣洩之勢自當酌量情形相機妥辦是伊二人異口同聲如出一轍也開放天然壩原係異漲無可如何不得已之下計豈有別無籌畫惟恃此爲長策乎且滾壩原以過水今水尙未過壩卽蓄意掘壩放水是竟以下河州縣爲壑可以自免干係如此則河道總督人人優爲之又何難辦之有况下河州縣每年被淹湖水日弱縱可遮掩目前恐將來爲害甚遠甚大亦不可不慮及也從前完顏偉任南河時因與德沛不合以致債事今尹繼善與白鍾山又未免有意扶同亦恐於事無濟爾

等可傳旨訓諭之○御史李清芳奏選用御史應令吏部將合例人員奏請考試得旨朕以保舉可得賢才李清芳所慮亦是著照所請行○癸酉諭江蘇巡撫陳大受奏稱金壇無錫等縣坍沒蘆田請豁免錢糧部議以與例不符未經准行等語從來民間田畝坍沒者免課漲墾者升科此定例也卽如陳大受奏摺中稱請自今每歲丈量坍者卽予以豁免等語言坍而不言漲則狃於一偏矣朕觀近日各省督撫見朕加恩百姓於地方一切事務不詳察事理不深籌國計凡有可邀名譽者一槩丐恩請寬請免以見其爲民請命之意且以爲縱干部駁而此事已上請可以使民知感部臣議事又以爲職司出納慎重錢糧於督撫題奏之事可駁者固議駁卽情節可准者亦無不議駁專以綜覈爲盡職而待恩出自上夫事事必恩出自上豈成政體總之內外臣工情形督撫多

失之寬部臣多失之嚴寬與嚴皆非中道督撫與部臣職任雖有
內外之分而爲體國之大臣則一朕以建中之理治天下而二三
大臣尙不能化此夙習是朕之誠有未孚也用是特頒諭旨宣示
俾共知朕意○丙子諭孫嘉淦許容大負朕恩見在交部覈議所
有順義縣應修城工著伊二人效力贖罪但令出貲無庸親辦可
傳諭高斌委員辦理○丁丑准流民出口就食○戊寅京師大雨
○己卯諭民間貿易官爲設立牙行以評市價所以通商便民彼
此均有利益也是以定例投認牙行必係殷實良民取有結狀准
給帖充應蓋殷實則有產業可抵良民則無護符可恃庶幾顧惜
身家懷遵法紀不敢任意侵吞爲商人之害乃聞各省牙行多有
以矜監認充者每至侵蝕客本拖欠貨銀或恃情面而曲爲遲延
或藉聲勢而逞其指勒以致羈旅遠商含忍莫訴甚屬可憫從前

外省衙門胥役有更名換姓兼充牙行者已經降旨敕部定議嚴行禁革積弊始除而衿監充行其弊與胥役等應將見在牙行逐一詳查如有衿監充認者卽行追帖令其歇業永著爲例嗣後如有仍蹈故轍而州縣官失於查察者著該上司查參議處其如何定例之處該部妥議具奏尋議如不肖衿監藐視法紀州縣官奉行不力者照胥役兼充牙行例分別治罪從之

東華續錄

乾隆十八

臣王先謙敬編

臣周澗蕃恭校

秋七月癸未訓八旗敦睦宗族○命各省撫恤流民○乙酉上

詣順懿密太妃宮問疾○丁亥諭溫惠貴太妃侍奉皇祖

多年淑慎素著朕幼年蒙皇祖養育宮中貴太妃時加撫視

今欲晉封皇貴太妃以申敬禮之意奏聞皇太后欽奉懿

旨欣允所有應行典禮著該部察例具奏○以納敏爲福建按察

使由江南○戊子上奉皇太后恭詣盛京展謁祖陵啓鑾

○撥直隸通州倉米四十萬石運天津備賑○命截留江蘇安徽

浙江江西湖北湖南漕糧六十萬石各補倉儲○辛卯吏部議准

直隸總督高斌奏順天府屬遵化州拱衛三陵近復於勝水峪

選定 萬年吉地所有守護官弁兵役及商賈匠作人等雲屯林
集遵化一州向隸府屬僅守境內非惟體制未稱亦恐呼應不靈
請將遵化州照易州之例升爲直隸州附近玉田豐潤二縣改歸
遵化直隸州統轄賦役仍照舊章官吏不煩添置從之○乙未

上奉

皇太后駐蹕熱河○己亥

上奉

皇太后自熱河啓鑾

詣盛京○乙巳諭據沈廷芳條奏三摺其一摺內稱賑恤之法一
曰地方官宜親身督賑一日散賑宜各處設廠一日災民宜計月
給糧一日流民宜隨地留養皆係見行之事敷衍陳奏毫無裨益
至請部頒冊式一條更屬無謂蓋地方官呈報水旱皆係就本地
情形豈能限以一定之式乎又稱北五省連歲有歉收之處民病
正劇士女仳離流轉載道强者鹿銜弱者填壑伊豈不知上年直
隸山陝俱屬豐收而捏此無稽之語乎又一摺奏稱雨澤時降邊

方類多發水密雲灤州河橋衝壞道路阻隔機舟祇候凡駐蹕之地需用水漿須鑿井數十輦道兩旁復築扈從臣工徑路經過道路不能耕種至灤州所築三橋費頗不貲申詳大吏止派千金應請益廣皇仁令直隸總督奉天府尹確查地方官儻有賠墊應悉給帑金其辦差勤敏者量加獎賞農民於蠲免之外亦稍予賞給等語此次經過橋梁俱係乾隆六年舊有木植不過稍加添補皆動正項錢糧有何賠墊之處且經行數月之久豈能免無雨雪前者密雲等處偶被水衝亦常有之事有司文吏不諳奔走其密雲懷柔等處因訥親率扈從人員先行朕令其身親督理官兵修造其近口橋座令提督保祝率領所屬官兵修造朕已悉加賞賚由是言之地方官全無尊君親上之意塞責而已有何應加獎賞之處至於灤州乃由山海關回鑾之路此番並未經由其橋梁尙未

修建有何被水衝壞以致道路阻隔至費用幾何地方大吏自必照例估撥焉有派累之理見在出口經行輦路皆向來通行大道凡屬臨幸理應修治並非開闢田疇如遇寬廣之處則扈從人員在兩旁行走至狹隘之處統歸御道並未將舊路開展有妨田畝沿途禾黍如雲如錦可望豐登此隨從數萬人所共知共見者一路俱有水泉儘足供閤營之用何須鑿井每處至數十口之多且巡幸亦所時有官吏之經理百姓之力役皆分所宜然若因此卽加獎勵賞賚不但無此政體並使官民不知尊君親上之義又豈可爲訓况朕前因安營除道未免稍用民力特降諭旨蠲免錢糧且沿途年老農民亦時加賞給此皆出自朕之特恩非臣工所可奏請者沈廷芳又稱車駕謁陵內外臣工自七品以上皆宜一體賞給誥封夫覃恩乃朝廷大典康熙年間皇祖因奉天陵

寢告成是以謁 陵時特頒 恩詔後兩次恭謁亦未舉行朕今

初次叩謁 祖陵國家典禮自有定制而未舉行之前臣下輒妄

行覬覦有是理乎科道職司言路必有益政治方可建白今沈廷

芳並未隨駕何以能知途閒之事非係地方官中有伊親朋或慮

此次奉行不力將有處分傳遞信息令伊陳奏希冀邀恩卽係伊

遣人跟隨密行偵探如此居心行事甚屬卑鄙其所陳奏又皆妄

誕若不加以處分無以示儆沈廷芳著交部嚴察議奏

尋降三級調用

八月癸丑以張楷爲倉場侍郎

由內閣學士遷

○丁巳諭前因孫嘉淦許

容將地方一切政務廢弛不理於謝濟世一案許容則挾私誣陷

孫嘉淦則扶同作弊二人大負朕恩是以令其於順義縣城工效

力贖罪今金溶奏稱孫嘉淦操守不苟中外共知且言歷任以來

其辦事之能否才具之優絀未敢深論是意中明以孫嘉淦爲才

守兼優之人不當處分者矣獨不思孫嘉淦自朕簡用直隸總督並未能辦一事卽如經理永定河務先請放水後倡築臺之議人以爲笑談及調任湖廣奏明往襄陽親閱隄工行至中途聞有匿名書帖之事卽行回省此豈封疆大吏所爲至於諸事廢弛扶同許容其錯謬難以枚舉卽其操守一節亦不過見功令森嚴未敢肆行貪黷耳豈一塵不染者可比金溶係伊門生力爲陳奏其意全爲孫嘉淦而發乃並爲許容丐恩可謂巧矣當皇考時臣工內有負恩溺職之員多令於河工城工效力贖罪者彼時言官從未見有一人陳奏何至今日乃敢喋喋以行其私耶且金溶摺內更申明不敢避師生之微嫌忘國家賞罰之大計巧詐已極朕卽位之初陳樹萱曾薦伊兄弟二人託言內舉不避親之義朕深悉其私衷曾經議處金溶此舉事同一轍夫言路爲國家耳目若

以師生私誼擾亂是非所關匪細朕不惜處一言官而使臣僚知假公濟私必難逃朕之洞鑒庶幾稍知儆惕亦挽回風氣之一道也金溶著交部嚴察議奏

尋革職

○戊午准孀婦之子犯法留養○

乙亥以李清植爲內閣學士

由少詹事遷

○己卯

上行圍於巴彥射

殪虎○是月廣州將軍策楞奏安南國夷目帶領兵船於七月與

桃山夷匪兆曉打仗殺賊千餘獲賊船百餘兆曉逃回桃山桃山

離欽州遠隔一海料不能潛入內地見檄沿海各鎮加謹巡哨又

有矣揚更名武賢卿及莫正豹等在安邊保樂地方嘯聚莫正豹

原名莫能仁係泗城府人手下人等廣西人多臣查泗城地方從

前原有安插莫姓之事其子孫見居凌雲縣境已行司跟查緝究

雲南總督張允隨奏矣揚莫正豹一稱交岡武氏後裔一稱高平

莫氏子孫各以恢復舊封爲名夷匪羣相附和臣設法招擒前後

獲僞官二夷匪千餘又保樂州土目農晏朝差頭目蔣朝通等赴
廣南營請剿除武莫二氏臣諭該土目以中外各有界限大兵無
越境代屬國剿除盜賊之理應速赴該國王處請兵又奏矣揚襲
奪都竜土目翁桂敗逃賊兵復攻南山南山與開化天生橋僅隔
一河因飭開化鎮整肅軍威遙助交人聲勢如賊兵越界一步卽
行擒斬六月翁桂奪回都竜當令開化府將前項難民資給護送
出口交翁桂領回復業但翁桂兵少援絕其勢終難保守均報聞
九月庚辰朔 上行圍於伍什杭阿射殪虎○壬午設綏遠城官
學○甲申免福建閩縣等四縣雍正十三年民欠寺租○諭暹羅
等國商船帶米至關者量免貨稅○辛卯裁四川夔關米船料稅
○甲午刑部議覆戶部右侍郎阿里衮奏湖南巡撫許容參糧道
謝濟世貪縱淫酗營私剝民各款皆虛惟失查書役犯贓屬實應

降一級調用查謝濟世各款既虛其原參革職之處應准開復失察輕罪仍照例議處許容合依奏事詐不以實律杖一百徒三年仍照例准其納贖湖南布政使張璨按察使今升四川布政使王玠扶同抑勒換詳均革職湖廣總督孫嘉淦扶同許容革率定案應革職其餘各官分別議處署糧道倉德通揭情由審俱得實可否照例議敘得旨依議許容張璨王玠孫嘉淦俱著革職倉德著交部議敘○乙未 上奉 皇太后率 皇后謁 永陵○丙申行大饗禮○諭前漕運總督顧琮督運來京奏請舉行限田之法每戶以三十頃爲限以爲如此則貧富可均貧民有益朕深知此事名雖正而難行卽去歲盛安均田之說也因示諭云爾以三十頃爲限則未至三十頃者原可置買卽已至三十頃者分之兄弟子孫則每人名下不過數頃未嘗不可置買何損於富戶何益於

貧民况一立限田之法若不查問仍屬有名無實必須戶戶查對人人審問其爲滋擾不可勝言夫果滋擾於一時而可收功於日後亦豈可畏難中止今展轉思維即使限田之法地方官勉強奉行究於貧民無補是不但無益而且有累也而顧琮猶以爲可行請率領地方官先於淮安一府試行之持論甚堅甚至與大學士張廷玉公訥親等動色相爭朕見彼如此擔當勇於任事意尙可取是以令其再與尹繼善熟商今據尹繼善陳奏難行之處與朕語不約而同則是此事之斷不可行斷不能行實出人人之所同然又豈可以嘗試今特降旨曉諭顧琮此事著停止並令各督撫知之○戊戌諭去歲春季京師雨澤稀少朕虔誠祈禱會降旨將輕罪人犯分別減免因推廣於各省如遇災眚之年著該督撫將清理刑獄之處奏聞請旨又恐各省遠近不同請旨行文辦理已

不及時應令該督撫除徒流等罪外其各案內牽連待質及笞杖內情有可原者一面量行減免一面具摺奏聞務使恤刑弭災之意不致稽遲也今據陳大受奏稱江南海州並所屬之贛榆沐陽二縣今夏被災已經咨部減刑但三州縣災皆已成較他省爲重減刑之事應請於九月初一日爲始至明年麥熟後停止等語夫赦非善政古人論之朕前所降諭旨原爲地方偶有水旱間修省刑之典亦感召天和之一端非謂災傷之地卽應一律赦罪也今海州旣已成災而始清刑獄是爲時已遲且明示以麥熟爲期則小民無知以爲此半年之閒可以觸法祇禁肆行無忌是誘民爲非也陳大受所見甚爲卑謬朕已於伊摺內批示訓飭恐各省督撫尙有似此錯會朕意者故特降諭旨該部卽行文知之○辛丑

上謁

福陵○壬寅行大饗禮○謁

昭陵○癸卯行大饗禮

○遣官致祭 壽康太妃 宸妃 懿靖太貴妃 康惠淑妃並

公主園寢親王貝勒大臣等墓○ 上奉 皇太后駐蹕盛京○

朝鮮國王李吟遣陪臣至盛京表貢方物○諭朝鮮使臣入貢係

國王族人稱君者始召見其餘止賜宴於禮部此定例也朕明日

賜宴諸王大臣官員於崇政殿朝鮮使臣亦著與宴以外藩陪臣

得廁朝臣之末係朕格外殊恩該部傳諭使臣知之○免盛京莊

頭應交新舊倉糧○甲辰 上以恭謁 祖陵禮成率羣臣詣

皇太后宮行慶賀禮 御崇政殿受賀賜羣臣及朝鮮國使臣宴

御大政殿賜餉頒詔天下加恩有差 御製盛京筵宴世德舞

辭並序曰乾隆八年秋朕奉 皇太后恭謁 祖陵還至盛京受

朝錫宴夫漢高過沛而歌大風情至斯動直己陳德况予小子觀

揚 光烈能無言之不足而長言之乎爰作世德舞辭十章章八

句辭曰粵昔造清匪人伊 天天文降思長白闔門是生我 祖

我弗敢名迺繼迺承逮我元孫章一元孫累葉維 祖之思我西云

來我心東依歷茲故土仰溯始謀皇潤過潤締此丕基章二於赫

太祖肇命興京哈達輝發數渝厥盟如龍田見有虎風生戎甲十

三王業以興章三爰度爰遷拓此瀋陽方城周池 太室明堂不甯

不靈匪居匪康事異放桀何心底商章四丕承 太宗允揚 前烈

倬彼松山明戈耀雪以寡敵眾杵漂流血惜無故老爲余詳說章五

余來故邦仰瞻 橋山慰我追思夢寐之閒崇政清甯載啓南軒

華而不侈鞏哉孔安章六惟我 祖宗欽 天敬 神執豕酌匏咸

秩無文帷幔再張樽俎重陳弗渝弗替遵我 先民章七先民宅

茲載色載笑今我來思 聖日俯照爵我周親蓋臣並召亦有嘉

賓歡言同樂章八懿茲東土允惟天府土厚水深周原膺膺南陽父

老於是道古有登其歌有升其舞

九章

我歌既奏我舞亦陳故家遺

俗曷敢弗因渾灝淳休被於無垠勿替引之告我後人

十章

○賜朝

鮮國王李吟

御書扁額加賞銀幣有差

○乙巳幸講武臺大閱

○諭王公宗室大臣等潔蠲祀典訓導兵民毋忘淳樸舊俗○丙

午 上親奠克勤郡王岳託及武勳王揚古利墓○遣官致祭長

白山北鎮醫巫閭山及遼太祖陵○諭從前盛京五部司員皆由

本地人員補放彼此交通蒙混舞弊不得不嚴行整飭是以將伊

等調至京師其員缺將京城部員調補三年更換今看來盛京官

員俱各勤勉積習亦改所有應升之缺若俱將京城官員補放有

礙伊等升途嗣後盛京司員若半將本地應升人員補用半由京

城補放則於部務有益而本地人員升途亦無礙將如何分給伊

等額缺如何升用及見在官員調用之處該部詳悉議奏再盛京

五部向無漢員後因有人條奏以戶工二部關繫錢糧刑部辦理刑名是以添設盛京五部事務較少見在考取筆帖式俱用繙譯人員辦理漢文事件並無貽誤所有添設漢員槩行裁汰將見在人員令至京候缺或留任候補之處該部一併議奏○丁未諭盛京府尹將軍等和衷辦事旗民毋得歧視○戊申 上親奠宏毅公額亦都直義公費英東墓○免河南帶徵乾隆七年以前民欠○命湖廣城綏新定長安五寨設遊擊管轄○浙江海塘工竣

冬十月庚戌朔 上御大政殿賜扈從王大臣等宴○免盛京興京等十五處旗地本年額賦及乾隆七年通賦○諭王公宗室等爾等得與朕在 清甯宮祭祀皆 祖宗所賜之福亦係滿洲之舊例也今觀滿洲舊例漸至廢弛如怡親王弘曉不佩小刀是何道理朕敬閱 實錄內載 皇祖太宗諭曰今宗室之子弟食肉

不能自割行走不佩箭袋有矢滿洲舊俗後之子孫何所底止是
太宗當時教訓諸子弟早慮及後之子孫遺棄舊俗况怡賢親
王昔時恪守制度爾等之所共知弘曉縱不顧 祖宗成憲獨不
念乃父乎至圍場之暇朕嘗射鵠連中多矢而與王等較射時往
往不中者非故讓也因見爾等之射憤懣於中故耳此次除莊親
王外其餘王等皆不能手格一獸由不自奮勉習學所致乃反以
爲從朕遠行致罹罪戾又如朕食肉未畢而誠親王和親王便放
盃匙默坐惟達爾漢王俟朕食畢始放盃匙方見遵循舊習且滿
洲蒙古漢人皆有一定之禮卽以漢人文學而論朕所學所知卽
在通儒未肯多讓此漢人所共知者亦由朕於書文勤加披覽不
染委靡之習故耳爾等皆係 太祖 太宗一脈子孫乃至如此
朕心深爲愧惕嗣後爾等宜以朕今日教導之言常如 祖宗在

天之靈親臨告誡革除陋習恪守舊章以仰荷 祖宗眷佑於奕

禩可不勉乎可不慎乎將此通諭在京王公宗室等知之○ 御

製盛京賦並序曰嘗聞以父母之心爲心者天下無不友之兄弟

以祖宗之心爲心者天下無不睦之族人以天地之心爲心者天

下無不愛之民物斯言也盡人宜勉而所繫於爲人君者尤重然

三語之中又惟以祖宗之心爲心居其要焉蓋以祖宗之心爲心

則必思開創之維艱知守成之不易兢兢業業畏天愛人於是刑

兄弟而御家邦斯以父母之心爲心也民同胞而物吾與斯以天

地之心爲心也孔子曰明乎郊社之禮禘嘗之義治國其如示諸

掌乎宗廟禘嘗之典固先王繼志述事之大經也自聖人象大過

肇封樹以來上陵之制漢代已然我國家肇興盛京郊岐之地

橋山在焉昔 皇祖六十一年之間三謁 丹陵用展孝敬 皇

考在位百度維新日不暇給適西鄙有事征役已勞又 藩邸時
曾奉 皇祖命往謁 祖陵是以十有三年中未舉是典予小子
繼承丕基懼德弗嗣深惟 祖宗締構之勤日有孜孜敬奉神器
言念盛京爲天作之基 永陵 福陵 昭陵巍然在望不躬親
祀事其奚以摠懋忱而示來許爰以乾隆癸亥秋恭奉 皇太后
發軔京師屆我陪都孝思以申 祖武是仰因周覽山川之渾厚
民物之樸淳穀土之沃肥百昌之繁廡洵乎天府之國興王之會
也昔幽居相度召頌公劉岐宅作屏周歌太王莫不於上帝之監
觀下民之君宗三致意焉故物以賦顯事以頌宣旣見於斯豈默
於言乎遂作賦曰歲大淵獻時旦柳中協律無射辨方庚辛厯吉
日以建旗駕應龍之翬鸞紛灑虛蕤蜿蜒旌雄虹撞鳴鳶周乎神
皋之壤屆乎箕尾之躔循我留都殺禮 珠丘懷精氣仰 德流

既備既申廼御黼座而覲臣寮維締造之彌艱撫草創之鴻圖曰
於休哉是蓋突載毫之子殷鑑宅錫之姬周憑虛致譏於東約安
處薦諂於西踰下此離爲十二之國合爲六七之侯鼎立瓜分者
益瑣穢旁魄不足以殫摠而孟堅平子太冲者倫方且豔陳峻函
隴坻之隘鹽池墨井之腴枵指天梁之麗三條五刺之區極鋪張
以詭辭彼何辭乃稱諸奚侔夫天作之皇宅又何藉長宏與魏舒
於是諮文獻考圖冊不慙不文爰賦其略聚精構思挂一漏百粵
我清初肇長白山扶輿所鍾不顯不靈周八十里潭曰闔門鳴綠
泥同愛渟三江出焉 帝女天妹朱果是吞爰生 聖子 帝用
錫以姓曰覺羅而徵其稱曰愛新是翦是除匪安匪康乃有葉赫
輝發界藩撫順遂築城於遼陽以爲東國之宗 天篤其祐載恢
厥功天命十年相險宅中謂瀋陽爲王氣所聚乃建盛京而俯闕

西故言其封域則雖始自秦漢歷隋唐以迄遼金歟而舉其規模則維新 皇運膺靈佑之獨深也仰符十度之尾箕臨析木之津得雲漢之所垂維北極之所鄰亦何異乎召伯相宅卜惟洛食奉春建策留侯演成哉於是左挾朝鮮右據山海北屏白山南帶遼水滄溟爲池澎湃瀾漫流湯湯赴瀾瀾撒漫洄回渾漠浴日沃星莫測其始東盡使犬之部朔連牧羊之鄙啓我漠惠之原擴我俄朵之址高燥埤涇原田每每走大野而拱 太室者萬有餘里其山則鐵嶺繡嶺平頂降龍木查石門東水南雙蟲喝嶧聚蔥嶺今岑巖嵌今嶺峒嶺今施嶂律今嶂嶺蔽虧日月源流湖江既孕奇而盤鬱亦合秀而隆崇故夫四蹠雙羽之族長林豐草之眾無不博產乎其中蹠類則虎豹熊羆野馬野驪鹿麋麇狼豺封駝狐狸獾貉跳兔婆娑鼯鼯艾虎貂鼠輕嘉其他牛馬羊豕之資以

日用者蓋填閭巷而烝寢訛羽類則野雞沙雞鵝鴨青鵝鵠禿
鷺維鵠在梁縮脖鳩燕啄木鵲鵠鴈鵠鵠鵠紅牙商倉黃鵠鼠化
白雁霜橫曰海東青出黑龍江林擊則天鵝祝魄旬搏則窟兔走
僵其他鵠雀銅背桃蟲鴛鴦雜沓紛泊騰軼翱翔其草則蒿艾香
蒲蘆葦蕭荻章茅水葱紅藍綬葛馬蘭知時木槿紀節厥惟人蔞
三椹五葉氣稟地靈功符陰陽商陸茵陳蒿蓄葦蕤蠶實兔絲均
能已疾其林則五鍼之松萬年之柏重障隱天幽林蔽澤挺崇槐
之曾青蔭柜柳之濃碧大椿以八千爲春壽樸以不材爲德爛紅
杏與緋桃紛白棟與黃檗山藤柔韌是資鞭策雞桑落黃可供蠶
織陸珍旣切海錯亦繁鯉魴鰭鰈鰱鮓鱖鯉鯢鱣鯢鰾鮓鮓鱖
比目分合重脣浮湛劍飾鮫翅柳炙細鱗牛魚之長丈計帶魚之
白韋編烏鰂之鬚黏石渡父之喙訂船他如蛇馬驢狗豚獺豹獾

出沒乎洶涌潛躍乎游淵蒼龍捷鬚而雲作赤螭掉尾而波開老
蚌含珠九光燭天神奇是韞瓊瑰是生雖山經與地志羌莫得而
詳焉懿茲奧區原隰昀昀厥田上中厥壤惟平抱海負蓋跨遼飲
宣涓河爲帶興京爲襟爰複陸而坦坦曠拓落而芸芸偉嘉禎之
萃蒼信囊籥之綢繆帝眷東顧用昇皇清而爲萬載之沛豐若
其測圭臬度廣輪依繩尺疏渠川歌經始詠攸爾又可略聞矣天
命天聰丕顯丕繼因其舊藩拓我新制規天矩地嚮明授時增八
門之詖蕩脅九遠之遷迤翼翼俾倪宕宕堞雉起圓丘於郊南
單墀垣之潔祕欽柴屬禋陳玉薦幣鼓雲和升繭栗以邀彤蜺而
昭祀事霜露在履春秋聿遷愜乎懷乎肇禋闕宮滌濯毛魚元酒
太羹文祖神宗爰歆於斯符帝車之太乙正王宮於未央重
三殿之寶枚表雙闕於闔閭闕名維何文德武功殿名維何崇政

建中高樓望氛厥題鳳凰後宮紫極交泰清甯開睢麟趾化洽家
邦維樸而安乃鞏而臧豈其工槐檻之刻鏤豈其飾棖檠之焜煌
豈其疏龍首之畏樂豈其叛鳳翼之昂藏匪有心於儉約乃潛揆
夫陶唐大政當陽十亭雁行爰飯爰度日贊日襄吉君臣之一德
而擴我闡於八荒正號紀元以受天慶於是定兩翼之位列八
旗之方黃白紅藍有正有鑊法其象於河鼓則其數於義經神其
變於三五握其奇於九宮大聖創制動協天象是猶易之書契
乃觀蹠迹焉樹以屏翰馭輕居重本支百世昌我宗潢佐命之勛
曰費英東顧都希福續茂蕭張曰有坐謀曰有折衝旣彬彬而濟
濟亦赳赳而彭彭其餘附鳳而攀龍者蓋車載與斗量爰制國書
聿興文教演義譯音物取其肖允維運海克稱檢校雖絕域其必
通卽纖故其亦貌若夫人自爲戰王者無敵角嚴則百壩失憑旌

揮則三邊定機義不反顧勇不重壁是以收四海而莫撓互千古
而鮮匹故班錄於累世用以酬夫勞績及其斗杓北指涉東背秋
爰狩中原我戎是修靡虹采裊蜺旂拖霧纛建雲旂後屬車前導
游乘我良產屏彼彤軒右忘歸之箭勁左繁弱之弓柔脩冽而雷
動鴻綢而星流又何必王良執轡織阿御軻也哉於是帶甲之士
百萬盡發鷹犬而驟驛騶卑泰山之爲檣跨渤海以張罟林林裔
裔列列夏夏命地而後中應聲而先拊散莖麋之羣友剔穴狸之
伏留駭嚙靡之儻俟擊郊兔之佻偷旣肩惰指倦而麋鹿之羣猶
緣陵蔽野比夏草之稠焉爰用三驅示無盡劉更命羽林伏飛之
士手豹尾踞虎頭搏洞熊殲澤獭觀壯夫之鶴躍快猛獸之驅縻
乃獻我成禽舍彼踐毛擇其上殺九惟左膘以奉 宗廟乾豆亨
炮次充賓客乃薦君庖班獲行賞訖乎興僚是蓋因天地之利習

軍旅之勞戰則克而祭受福古者蒐苗獮狩之禮所爲昭詎其害
三時之土穀奪百姓之腴膏蹂桑柘之地廣虞獵之郊如子虛上
林之所嘲也哉將將蕃后夔夔列君奉鬯來朝齊邀侍宸或稽首
而請聘或傾心而納姻於是樂以九奏饗以八珍適呼韓之朝天
踰頡利之舞庭合內外爲一家自我祖而已然坰牧之宜曰大
麥河互肥壤之博衍茁靈草之敷披夏蟲避境春泉漾波是以駟
駒之牡蕃萐孔多爾其驪騊騊駼駼駼駼駼駼駼駼駼駼駼駼駼
或眠而馱或行而馱惟致遠之有賴亦揚威之無過畿甸旣闢農
桑是資爰飭田畯爰勵甸師物早晚之種辨高下之宜男則耕耘
是務女則織紉是謀抑工賈之末業勤衣食之本圖故深耕易耨
穀用滋也九夏三耘免汙萊也雨我公田遂及私也庀我錢鎛銍
艾時也我簋斯盛實佳粢也我倉如陵庾如坻也服尙布棉奚織

美也器用陶匏戒奢靡也土物是愛神降嘉生黍維秬秠稻維糯
杭粟維糜芑粱維白黃解蠶胡麻來牟鈴鐺蘇分紫赤豆有豌豆
蔬則藟藟薤蒜蘿蔔韭蔥萹蒿蒲筍紫萁苡香壺盧蔓菁萑苳葵
藴鮮不旆旆穊穊率率懔懔驛驛厭厭縣縣穰穰惟土脈之獨純
斯穡事之孔良農隙教戰守禦相望國以殷富兵以威彊鬱蔥佳
氣盤礴無垠民風噩噩伋伋自然休有烈光格於皇天上帝
其子之維有歷年是以我世祖因人心之歸清順天意之厭
明掃驅除之閏位統子弟之精兵無亡矢遺鏃之費而膺圖正位
乎燕京蓋嘗考千古之興替稽百代之厯數詎符瑞之難謀信仁
義之堪守斥逐鹿之盡說審神器之有授乃知帝命不時眷清
孔厚也不有開之何以培之不有作之何以得之夫其披荊棘冒
氛霾歷艱辛躬利害無嬗代之迹而受車書之來者蓋書所謂千

湯有光詩所謂民之攸歸矣皇矣陪都實惟帝鄉乃命秉鉞之帥
乃置五部之卿民安郡縣旗樂屯莊春秋耕斂我倉我箱朝會朔
望濟濟蹕蹕昭萬年之有道卜百世之靈長乃作頌曰於鑠盛京
維濟之陽大山廣川作觀萬方虎踞龍蟠紫縣浩穰爰浚周池爰
築長塼法天則地陽耀陰藏貨別隧分旗亭五重神基崇峻帝系
繇曰周曰邠岐漢惟豐沛白水慶善興王之會長白隆隆滄溟濊
濊形勝之選奕世永賴俯臨區夏襟控中外休養百年旣豐而泰
溯其始謀繼序敢懈昔我 聖祖三至斯土芟麗六飛森沈萬旅
孔碩九重不遑安處祇謁 山陵亦臨朝宁置酒故宮用酬父老
乃霑恩施逮乎編戶匪勤於巡良慕乎古閔予弗德實纘不基歲
時 太廟陟降格思緬仰 鼎湖惟瞻惟依荷 天之龍際時之
和駕言徂東絡繹羽儀風舉雲搖鱗萃魚麗我賓我臣我行是隨

載至神鄉載觀

園寢靈鬱崇輝祥凝巨藩原廟衣冠霸陵衾枕

松柏雲縵溪池流淦蕩滌洪鑪陶甄羣品石馬悲風淚泉霑衽豈
必焚牆一氣是稟聿造故宮故宮赫赫聿升太階太階奕奕無彩
之飾惟厚之積皜曜皜照歛絕烏赤左城右平坤閭乾闢土壁葛
鏗遐哉儉德詒我孫謀萬年之宅乃開南端設席肆筵爰爵周親
及彼駕鸞南陽故舊洒如言言惟此嘉師列祖之臣是噢是咻

是貽我躬敬之敬之翼翼惴惴於億萬歲皇圖永綿○辛亥上

奉 皇太后自盛京回鑾○丁巳調翁藻爲江西按察使以方觀

承爲直隸按察使

由清河道遷

○乙丑寬奉天海運米禁○丁卯命直

隸被災各屬減價平糶○己巳諭昔蕭何相漢終舉曹參羊祜佐

晉亦進杜預薦賢自代青史稱焉是以宋有詔觀察使薦忠勇自
代之條金有勒宰相奏賢良自代之諭今三載考績黜陟幽明邦

之要典大臣徒遵例自陳乞賜罷斥而不舉賢自代使逐其高尙

職將誰任乎豈朕夢寐求賢寅亮天工之意耶其以明歲爲始凡

大臣自陳罷斥者令各舉德行材能堪以自代之人隨疏奏聞若

一人兼數職者材恐難全舉二三人或三四人聽食祿及革帶之

士均許但不得舉同列及位在己上者著爲令○實授蔣溥湖南

巡撫周學健福建巡撫○調陳宏謀爲陝西巡撫塞楞額爲江西

巡撫○以劉於義爲戶部尙書阿里袞爲山西巡撫傅恆爲戶部

右侍郎由內務府總管遷○以歸宣光爲吏部左侍郎原任戶部右侍郎彭啓豐

爲刑部左侍郎由內閣學士遷○癸酉命山東巡撫兼提督銜○甲戌

上奉 皇太后還京師○命留山東漕糧八萬石備糴○禮部議

覆福建學政吳華孫奏漳州爲朱子行政設教之邦今有祠在芝

山請頒 宸翰楊時游酢俱程門高弟游酢獨未從祀亦屬闕典

等語查朱子婺源家廟延平講學舊區俱頒賜 御書扁額其祠在芝山者應如所請頒發楊時從祀謚宗原以朱子淵源所出故程門高弟如呂大臨謝良佐皆不與焉該學政所請游酢從祀應毋庸議從之○是月山西巡撫劉於義奏山右米價視別省加貴歸化城托克托城一帶年歲豐收應將口外米運至內地但歸化城等處距太原千餘里舟車輓運甚難臣前在蘭州於黃河中以牛皮混沌運米最爲便捷因遣人至蘭募善運混沌水手二人並製買牛皮混沌二十於保德州買米三十八倉裝入試運不過四日已至永甯州磧口自此陸運至汾州每石較市價可減銀四錢陸運至太原可減銀二錢似於百姓有益見已照式廣製俟來春再試有效奏請動項買米轉運以濟民食得旨卿如此留心民瘼朕實嘉悅已交阿里衮令其續此妥辦矣

十一月庚辰朔諭朕君臨天下勤求治理小民生養之源無日不爲深計而勸諭之術尤在久道化成是在督撫諸臣董率羣吏日就月將實用其心於興化致治之要以駁駁於上理非徒奉文守法循分苟安遂謂無忝厥職也朕聞雅爾圖在河南官署鞠爲茂草許容之在湖南至以文書廢紙糊窗此卽孫樵所謂以官爲傳舍醉濃飽鮮笑與秩終而已雅爾圖許容尙稱勤於職事者而猶有此則推而至於他省等而至於州縣其在官無異一驛耳古之人臣處官事如家事試問今之爲官者其料理家務果肯若此之草率簡陋漫不經心乎此雖細務可見其心不在官欲望其曲體民情而代謀家室此必不可得之數也張九齡云縣得良宰萬戶息肩州有良牧千里解帶蓋吏數變易則下不安業久於其任則民服教化若當官而存苟且之心將百事皆從廢弛矣漢時治尙

循良璽書勉勵贈秩賜金以儲公輔之用意在久任以安民也雖朝廷用人量才審器必酌人地之宜自不能一無更調而欲吏與民相接俾氣協而情通究以久任爲常法居是職者暫不忘久卽一日而爲數十年之計久不生倦數十年仍當如一日之心則訓俗型方自必視爲切己事也今親民之官不至苞苴肆行亦多兢兢職守然僅惕於功令以遏其貪饕迫於考成以策其勤敏簿書期會之外豈真有以民心之醇薄爲念者歟此間閭之所以不盡馴良而化導之未洽也夫身膺民社卽爲其父母師保官之視民如子弟則民之視官如父母官民同其休戚而情意相接斯叩之而卽應感之而易從今之州縣於黎元之身家性習視同膜外平時不相聯屬而誠諭俱屬具文澆漓溺於其心陵競狃於所習此則所謂痼疾外視若無所苦而病隱中於本根愈久愈大治之甚

難誠不可不亟爲究心者試思身爲牧令若但司簿領事承接則一書吏之能事何以官爲昔韓延壽閉閣思過而民自悔悟吳祐以身率下而民不忍欺是民非無良權實操之在上惟教深於隱微故其樹績益顯爲督撫者果以此爲課最使有司提撕警覺百姓觀摩漸漬日計不足月計有餘將見官與民相習情與事相通一氣感孚不致扞格於以興教化移風俗而無難也儻任其波流無以發其孝弟廉讓之至性豈能使之奉長吏之命而羣然率從乎朕聞駟馬不馴御者之過也百姓不治有司之過也有司與民漠不相關咎在督撫督撫不能使有司化導其民咎卽在朕今吏多玩愒而風不古若朕實愧之國家承平日久治具畢張雖久道化成未易驟至而整吏治以戒因循正人心以除積習凡有莅民之責者皆當審時務之急先思致治之根本而加之意焉其各遵

奉毋忽○辛巳召包括來京以喬學尹爲山東布政使

原任湖北布政使

○丁亥諭軍機大臣等據姜順龍奏稱東省有蠶二種食椿葉者

名椿蠶食柞葉者爲山蠶此蠶不須食桑葉兼可散置樹枝自然

成繭臣在蜀見有青杠樹一種其葉類柞堪以餵養山蠶大邑縣

知縣王雋曾取東省繭數萬散給民間教以飼養兩年以來已有

成效仰請飭下東省撫臣將前項椿蠶山蠶二種作何餵養之法

詳細移咨各省如各省見有椿樹青杠樹卽可如法餵養以收蠶

利等語可寄信喀爾吉善令其酌量產椿青等樹省分將餵養

椿蠶山蠶之法移咨該省督撫聽其依法餵養以收蠶利再直隸

與山東甚近餵養椿蠶山蠶不知可行與否並著寄信詢問高斌

○戊子諭大學士鄂爾泰張廷玉俱已年邁乘馬維艱著在紫禁

城內乘轎行走○賜普濟堂京倉米二百石○庚寅安南國王黎

維禕表謝賜祭及襲封恩進貢方物○戊戌吏部議覆江蘇按察使李學裕奏月選州縣官請於得缺後吏部會同刑部試律例數條將原卷進呈查新選州縣官員見皆正途出身其未中式時學政按臨各講律例一條及鄉會試覆試五判立法已詳且銓選會同刑部亦乖體制所奏應毋庸議得旨李學裕所奏月選州縣官掣籤得缺後考試律例數條事屬可行但吏部會同刑部誠如部議體制未協著卽於九卿驗看時摘問律例數條令其條對與履歷並呈著爲例○己亥彗星見○以秦蕙田爲內閣學士

由右通政遷

○庚子諭引看女子若八旗所屬外任文武官員之女俱令送京路遠往返維艱嗣後引看女子外任文官自同知以下武官自遊擊以下之女著不必送京○甲辰免河南民欠常平社倉息穀○乙巳大學士鄂爾泰等議直隸總督高斌奏永定河上游爲桑乾

河發源山西境內縣長八百餘里多開渠道可以灌溉前經大同西甯等縣居民捐地開濬未成尙留渠口舊迹乾隆六年該處士民又呈請借帑興工經署督臣史貽直遣員查勘事屬可行移文到臣臣念興修水利不特有裨民田亦可減洩永定水勢應請於桑乾河南北兩岸各開渠一道北岸自山西大同之西堰頭村黑石嘴起至直隸西甯之辛其村止計長四十六里南岸自大同之冊田村起至西甯之揣骨疃止計長五十八里渠尾俱歸桑乾正河北岸地勢衍順應先施工俟有成效再行估挑南岸又山西應州境內之渾源河發源渾源州匯歸桑乾亦可開渠灌田應俟兩岸渠成再商辦理至永定漲發之時湍流奔注最稱險急若於宣化境內之黑龍灣懷來境內之和合堡宛平境內之沿河口三處建築玲瓏石壩以束其勢則下游水患可減亦應先將和合堡築

壩俟試行有效再於黑龍灣二處興工查開渠既有裨於河道民生應如所請惟永定水勢洶涌若於下流層層攔築水大之年上游不無阻遏應令該督撫詳慎辦理從之尋高斌奏桑乾河自西甯石匣村入山十八里至黑龍灣又一百八十里至和合堡又四十里至沿河口又一百三十里抵石景山自和合堡以下一百七十里皆兩山夾束桑乾並洋河等水匯此勢等建瓴臣擬於和合堡先建玲瓏石壩一處以勒其直注之勢則下游之患可減至壩上山勢陡峻壩身止高五尺遇汛漲時水卽漫壩而過此玲瓏壩之設止於汎流中稍加節制實不至有阻遏之虞水路雖經截頓然在山閒噴薄衝刷泥沙亦不至有壅淤之患謹將道里情形備細陳明得旨覽奏始悉矣○丙午加尊 溫惠貴太妃爲 溫惠皇貴太妃○己酉命通州良鄉分設飯廠加賑流民○免謁 陵

經過地方額賦十分之三○撥四川灌縣倉穀六千石於松潘鎮平糶○大學士陳世倌乞假葬親允之

十二月庚戌朔陳惠正緣事解任以赫慶爲陝西按察使

由山西河東道

遷

○辛亥命吏部尙書史貽直協辦大學士○召張嗣昌來京以

高山爲福建布政使

原任山西布政使

○壬子命京師五城設局平糶○

除浙江温州台州漁稅○乙卯葬

端慧皇太子於朱華山寢園

○戊午諭昨歲江蘇安徽兩省被災獨重是以竭力賑恤復恐民

隱未能上達民俗或未醇良宵衣軫念用是差員前往巡視宣諭化導今年仰蒙天恩兩江薄有收穫民情業已相安朕思移風易俗非可期以歲月之事而三四人亦豈能徧及閭閻若徒視爲虛文毋甯省其繁令惟在地方有司實心體朕愛養百姓之念與民休息彰善癉惡則風聲自樹而日計不足月計有餘矣所有命

往宣諭化導使著於明春回京○免四川成都等三縣乾隆七年

以前未完茶課○修築廣東海康等二縣瀕海隄工○己未暫停

雲南開化府馬白口額稅○庚申召陳高翔來京以張嗣昌爲廣

東按察使

原任福建布政使

○癸亥

皇六子永瑤生○召姜順龍來京

以倉德爲四川按察使

由湖南岳常道遷

○甲子諭陝西蒲城縣王幼女

被殺一案陳惠正用刑誣服牽連無辜經塞榜額題參已降旨將

陳惠正交部察議今據慶復奏稱陳惠正面稟此案巡撫將本司

附參心有不甘已具密摺辨明並將揭部科印文交家人帶往京

中若摺子已蒙恩准即將原文帶回不必再揭若摺子不准卽令

投揭部科於回陝日再向總督衙門補揭等語陳惠正前有奏摺

乃請嚴抑勒換招改詳之例並未申辨王幼女被殺一案乃於督

臣前捏稱密奏並稱若蒙恩准卽將通揭部科印文帶回若摺子

不准卽令投揭夫朕之批示奏摺伊家人何由得知卽使將摺子發出而不准則投揭准則中止又豈家人所能主持其中顯有探聽商謀情弊似此居心行事甚屬狡詐欺罔陳惠正著革職交與該督嚴審定議具奏○準噶爾遣使表貢方物○乙丑諭據慶復奏稱陳惠正因王幼女一案被巡撫塞楞額題參陳惠正具密摺申辨並帶有揭部科之文若奏而不准卽將揭帖投遞部科准卽中止朕覽奏而知其必與伊兄陳惠華商量特命大學士等詢問據陳惠華奏稱惠正原有辨摺並部科揭帖遣家人齎送來京寄信與臣臣以惠正係被參見交部議理宜靜候何得瀆辨立將奏摺並揭帖令家人帶同等語陳惠正以密奏之摺及用印之文齎送來京與伊兄陳惠華相商投遞伊旣欲駁回豈有不奏知於朕之理况伊身爲大臣旣深知其非卽當據實參奏乃隱匿不發及

朕詢問始行奏出大臣事君豈容如此詐僞夫父爲子隱子爲父隱直在其中朕非不知以此風示天下然君臣之倫實在弟兄之上陳惠華著交部嚴察議奏○諭三年京察之期朕命自陳之大臣舉賢自代者原係朕寤寐求賢欲多得人才之意且視其所舉亦可覘其人之識見心術也乃臣工等不能深喻朕旨陳奏紛紛如御史陳其凝奏稱自陳之人若人人可信其賢則不宜聽其乞罷遂其高尙而無庸舉賢以自代等語夫舉賢自代在大臣爲推賢讓能在朕爲儲才備用豈有大臣中舉一人卽將舉一人者更換之理乎又云自陳之大臣有意避嫌勢必博採名望而處士虛聲終南捷徑所謂賢者不賢矣如必親知而後舉則呈身識面自昔所譏不能保其無攀援黨附之私等語夫大臣薦賢必當孚公論而協眾望若親知者旣疑其黨援而採望者又謂爲捷徑是薦

賢竟屬必不可行之事古云進賢受上賞蔽賢蒙顯戮又何以稱焉又云爲大臣者如無可信之人卽照例具本自陳不必拘於定例勉強塞責等語如此勢必至於人人緘默不舉一人豈闕門顧俊之典獨不可行於今日乎禮云爵人於朝與眾共之昨李清植奏請明舉尙屬可行朕已敕九卿科道集議矣夫朝廷綸綍下頒如果事有未當雖面折廷諍亦爲朕所取若徒於語言文字之間深文辨駁旣大昧事君之體亦適見其識見之卑矣此風斷不可長陳其疑著嚴飭行○丁卯以星變示儆特詔修省○飭直省冬令乞除蝻孽○辛未增設廣西富川等十七州縣鄉勇○癸酉諭昨召見大學士陳世倌據奏近日彗星見宜下修省之詔以宣示百官使天下共知之將來並可垂之史冊等語朕思人主君臨天下敬天勤民之心必嚴恭寅畏無時不懍上帝之鑒觀念兆人之

休戚以期弭咎於未然誠以修省全在乎平日此朕之所以夙夜兢兢者事天以實不以文以誠不以僞也若平日不能時幾交敕及至上天垂象方事修省已屬臨事儆惕所爲緩不濟急若災異旣徵又不竭力補救但託於文告飾爲敬慎儆懼之辭而無引咎責躬之實徒務臣民之觀聽以塞責是明以示戒而更加粉飾則慢天欺世其過愈大豈能感召天和潛消沴戾乎前日御門時朕以京師得雪甚微且星象見異面降諭旨原欲與大臣等交相儆省深思所以致此之由闕失何在亟圖悔改並非欲眾人間知冀垂史冊掩一時之耳目示後世以虛文乃陳世倌身爲大學士見不及此而勸朕爲文飾之事是朕心不能見白於大臣朕深以爲愧此正朕之所當修省者朕雖不及古之帝王而誠敬事天之心無一刻之敢懈可以自信可以質諸神明今星象示儆乃僅欲以

修省一詔謂可了事卽此一念誠乎僞乎此實朕夢寐中所不敢萌者用是特降此旨俾知格天之道惟在修省之實而不在修省之文我君臣其共勉之○丙子禁硝磺出口○丁丑召見夷使圖爾都等諭曰朕本欲明年召見爾等賜予筵宴因爾等求觀步踏故今日卽令瞻仰噶爾丹策零疏內稱前往西藏之人准由噶斯路賜助牲畜每年准派二三十人巡閱托爾輝等處故遣爾謝恩請安朕深爲欣慰一應進藏所加恩典吹納木喀回巢時自然詳悉告知爾台吉查閱托爾輝乃係朕降諭旨但疏內又稱貿易之人不論何時皆可前來來京貿易者在甘涼等處任便皆准貿易並非朕之原旨朕大臣等奏言此係噶爾丹策零巧詐以圖僥倖朕言噶爾丹策零未必如此巧詐蓋伊使者稟告之誤也昨朕大臣向爾訊問果係爾等誤告之故大凡爲使之人往返勞頓詞語

繁多隻言片語保無錯誤朕亦不復追咎爾等但爾等歸時須詳告噶爾丹策零知悉貿易之人於限定年分或春夏或秋冬總在一年之內不論何時皆准進邊貿易非不分年限無論何年皆可前來也若來京貿易亦應在定例來京之年但爾等貨物皆係自備腳力原屬艱難京師道遠力不能前卽在肅州貿易亦屬可行肅州與爾遊牧相近尙可獲利若在甘涼等處實屬不便朕並非以爾等爲外夷不令留頓甘涼也爾等來時並從彼處經行其地皆屬褊小商販無多爾等貨物到彼若貨賣不盡將馱載回歸耶抑久住以待售耶勢必反至失利與爾等何益肅州亦屬褊小不比京師因前旣與爾國議定先期傳集商人至彼與爾貿易若無指定之處商人豈能各處豫備耶如欲來京貿易於定限年分仍來京不然卽在肅州亦可朕此等籌畫皆與爾等有益爾明告噶

爾丹策零知之夷使圖爾都叩謝奏言 大皇帝諭旨甚是所稱

貿易無論何時與甘涼等處皆可貿易之語 大皇帝敕書實未

開載我等來時曾向中國大臣言及意謂已經許可誤行稟告噶

爾丹策零遂據我等之言寫入疏內乃我等之過非噶爾丹策零

有意如此也 上曰偶爾錯誤朕不責備想噶爾丹策零亦未必

歸咎於爾爾等可勿疑懼惟以朕敕書開載者爲憑自屬妥協但

一切事宜既經議定自當永遠遵守今初次舉行即便反覆可乎

不惟於事無益眾人觀瞻亦屬不雅朕前降旨甚明豈有卽行更

改之理可傳諭噶爾丹策零其善體朕意圖爾都奏稱一切事宜

大皇帝皆已降旨敬謹記憶同時詳告噶爾丹策零知之○是

歲朝鮮琉球安南蘇祿來貢○會計天下民穀數各省通共大小

男婦一萬六千四百四十五萬四千四百一十六名口各省通共

存倉米穀二千九百六十二萬六百五十二石二斗四升七合零